

DOMINGO 4 ORDINARIO CICLO A

PRIMEIRA Sof 2, 3; 3, 12-13

Farei que quede no medio de ti un pobo pobre e humilde

PROCLAMACIÓN DA PALABRA RECOLLIDA NA PROFECÍA DE SOFONÍAS

Buscade o Señor, todos os pobres do país,
que cumpristes os seus decretos,
buscade a xustiza, buscade a humildade.
Quizais poidades escondervos no día da ira do Señor.
Farei que quede no medio de ti un pobo pobre e humilde,
e no Nome do Señor terá o seu refuxio o resto de Israel.
Non farán maldades nin dirán mentiras;
non se atopará na súa boca lingua mentireira.
Si, eles pacerán e deitaranse sen que ninguén os espante.

SALMO RESP. Sal 145, 7. 8-9a. 9bc-10

**R/ (Mt 5, 3): Ditosos os que teñen espírito de pobres,
porque deles é o Reino dos Ceos**

Ou: Aleluia

El garda por sempre a súa fidelidade:
faílles xustiza aos oprimidos
e dálles pan aos famentos.
O Señor libra os cativos,

O Señor abre os ollos dos cegos,
o Señor endereita os dobrados,
o Señor ama os xustos.
O Señor protexe os forasteiros,

Sostén os orfos e as viúvas,
extravía os camiños dos malvados.
Reine o Señor por sempre,
o teu Deus, Sión, polas xeracións.
Aleluia.

SEGUNDA 1 Cor 1, 26-31

Deus elixiu aos febles do mundo

**PROCLAMACIÓN DA PALABRA RECOLLIDA
NA PRIMEIRA CARTA DE SAN PAULO APÓSTOLO AOS CORINTIOS**

Reparade, irmáns, en quen sodes os chamados: entre vós, mirando as cousas con criterios deste mundo, non hai moitos sabios, nin moitos poderosos, nin moitos da nobreza. Ao contrario, o que hai de parvo no mundo, iso foi escoller Deus para desconcertar os sabios; e o que hai de débil no mundo, iso foi escoller Deus para desconcertar o poder; o plebeo e mailo desprezado, iso foi escoller Deus: o que non é, para anular o que é; de xeito que ningún mortal poida campar diante de Deus. Por El é por quen existides vós en Cristo Xesús, quen se fixo para nós a sabedoría e maila xustiza, a santificación e maila redención que veñen de Deus. E así, como está escrito, "quen está orgulloso, que o estea do Señor".

ALELUIA Mt 5, 12a:

Alegrádevos e reloucade, porque grande será a vosa recompensa nos Ceos

DOMINGO 4 ORDINARIO CICLO A

EVANXEO Mt 5, 1-12a

Ditosos os que teñen espírito de pobres

PROCLAMACIÓN DO SANTO EVANXEO SEGUNDO MATEO

Daquela, vendo Xesús a multitude, subiu ao monte e sentou. Achegáronselle os seus discípulos, e el, tomando a palabra, ensinábaos dicindo:

-Ditosos os que teñen espírito de pobres,

porque deles é o Reino dos Ceos.

Ditosos os que choran,

porque eles serán consolados.

Ditosos os non violentos,

porque eles herdarán a terra.

Ditosos os famentos e sedentos de xustiza,

porque eles fican fartos.

Ditosos os misericordiosos,

porque eles acadarán a misericordia.

Ditosos os de corazón limpo,

porque eles verán a Deus.

Ditosos os que traballan pola paz

porque eles serán chamados fillos de Deus.

Ditosos os perseguidos por causa da xustiza,

porque deles é o Reino dos Ceos.

Ditosos vós cando vos aldraxen, persigan e calumnien de calquera xeito pola miña causa: alegrádevos e reloucade, porque grande será a vosa recompensa nos Ceos.